

汝南詩話

上冊





右集汝南詩話者



借山強老先生所作先生

少負逸才自膺鄉薦領教

秩以至

秦藩左史所在詩聲藉甚往

往與名流埒詩話乃其緒  
餘者耳頃辱遠惠珍愛之  
不敢自秘因翻刊與四方  
共則夫旨意宏深詞語豪  
放詩林宗工固有所取而

開關啓鑰於一二初進者  
未必無少助云

正德九年孟夏既望知汝州  
事關西臨潼門生楊參謹  
識于德政堂



弘治年孟東野詩集有強晟叙 一段附記


汝南詩法明史藝文志著  
劄而不可見於石和藏書  
論抑如序與惜語首  
四葉紀永崇成化弘治心  
德回朝強自肉且待作  
者

一  
記



汝南詩話

借山強晟



東坡先生詩集卷之五

卷之三

卷之三

作瓶中第二盃

趙子聰兄弟

汝南趙子聰侍郎孟弘子也善花竹翎毛得  
子昂筆意正統末為吏部郎中從

狩不返同時有夏仲昭竹天下珍重高麗至以  
金購之今世不知有趙子聰花鳥亦不幸也  
夫子嘗與故家見數幅其精妙不減子昂云

子聰存日先君嘗贈以詩曰四海風流趙子  
聰丹青筆底奪天工水晶宮主如相見應謂  
郎中有祖風水水晶宮主子昂也厥元子裕為  
御史亦能詩嘗有一絕云黃草坡前百萬兵  
碧油幢下一書生如今始覺為儒貴臥聽元  
戎報五更

揚季學遇詩僧

汝南揚季學永樂間為成都府判年甫三十  
三嘗蒞新繁過一寺其長老據座弗為禮揚  
怒呼從者捽之下將加撻焉有學諭趙弼大  
呼曰判府莫草草渠乃詩僧也揚命和其吟字韻  
即應聲云敲動禪關驚鶴夢徹開經藏聽龍  
吟乃大驚遂與定為方外友

巡城鐵杵

寧陽許學士道中為編修日嘗有一丐者入  
其宅犬噬之遂堅臥不肯去許以飲食及衣  
履與之渠弗顧且佯死許甚被所撓先君時  
為巡城御史偶過之許告以故先公笑曰公  
第置酒吾能立使之去不煩飲食衣履也許  
問策不荅徐語左右曰此丐者死必累吾許  
公可於日晚敲殺投之井飲良久復呼一力

取鐵杵擲之地丐者已色變會將晚忽聞犬  
吠聲甚厲許驚問之蓋此丐者已奔走出門  
去矣先君因戲贈許一絕云鷄不延賓犬致  
災從今雙戶定慵開乞兒如更相欺得再喚  
巡城御史來許和云今朝無賴欲相灾却悔  
柴門浪與開從此也知投鐵杵恐渠明日又  
重来遂相視大笑痛飲而去

口吃糾儀

茂彪慶陽人為人口吃自呼其名為茂包景  
泰初與先公同為御史嘗侍班

上未出王御史越偶與錦衣官立語彪默識之  
上既視朝彪乃糾越云臣是御史茂包有臣一  
邦御史王越東邦走入西邦裏蓋彪初見越  
在面班不知

上出時越已復東班矣於是越即劾彪妄糾  
上以彪口吃一笑而宥之先公因戲以詩云  
角峨峨侍早朝含香常得近

神堯東邦莫入西邦裏從此人人憚茂包

狀元年末

劉文介儼正統壬戌狀元及第先公同年也  
有邵進者在甲尾劉嘗致東于邵自稱為年

末或謂邵云劉公笑子殿甲尾故云然邵怒  
曰狀元不是天上人做我見劉必辱之先公  
笑而解之以詩云狀元本是龍頭選龍尾分  
明屬邵卿龍尾掉時天必雨龍頭未必敢相  
輕邵聞之亦解顏

憲臺雅譔

王威寧越為御史日先君為道長一日公署

小酌日既暮當赴都堂揖王乃立於中門出  
令日能以我為字者則放出時一御史曰汝  
乃囚字也王笑而放之又一御史曰汝乃閃  
字也亦笑而放之次及先君王厲聲曰我乃  
何字先君亦厲聲曰門內有龜乃闔字耳衆  
大笑

寫竹求師

正統間東吳夏太常仲昭善寫竹名擅一時  
玉田劉子鍾時為郎中將求其筆法夏恐其  
逼已未之許先君一日延仲昭寫竹子鍾求  
侍筆硯仲昭方作竿子鍾不覺驚喜仲昭覺  
之投筆曰公非劉子鍾乎子鍾遽下拜遂授  
其筆法先君因贈以詩云渭川春雨萬竿新  
憑仗清卿為寫真今日相逢劉夢得襍材從

此付何人襍材文與可故事也

馬蘭齋開字韻

蘭齋馬彥芳徐州人景泰間為汝寧教一時  
登科第者多出其門先生精舉業尤長於詩  
時太守殷文撫在郡每遇旱澇祈禱輒應以  
詩賀者甚衆惟彥芳二句擅場云禱雨雨後  
天上至祈晴晴自望中開太守得詩大喜謂

其僚佐曰蘭齋開字韻可謂壓倒元白矣

郭彥理詩評

雲中郭彥理在陝臬日同寅有李僉憲者去  
官郭賦詩贈之一聯云新豐市上歌三疊長  
樂坡前酒一甌他日先君謂郭曰聞彥理昔  
者送李公新豐話別而復回長樂坡飲酒何  
也郭未悟因舉此一聯問之郭大笑

前輩雅譔

關中閩文振雲中郭彥理同年進士俱有詩  
名天順末彥理副陝臬陞四川按察使文振  
叅政浙江偶過家先公與二公友善邀致公  
署酒邊文振笑語彥理汝既為廉使而乃郎  
却名士廉這箇官顛倒是你父子做彥理亦  
笑謂文振曰公勿爭閑氣我做廉使讓你做

士廉便了先公大笑二公亦大笑予為童子侍側聞此謔追憶之倏已五十年矣

汝南舊俗

成化初先公自陝臬致仕歸汝予年甫十四見有二翁携酒來賀先公拜之而此二翁乃立扶之繼有一翁亦携酒至彼翁拜之先公則立扶之晟訝之請問其故先公曰鄉黨莫

如齒先二翁者乃吾之兄行後一翁乃吾之弟輩也予後始知先二翁乃趙公惟勤劉公源甫後一翁乃劉公克常也噫此風之厚今不可見漫筆于此以傳鄉人

前輩風致

成化初先憲使致仕居汝麻城李方伯正芳繼自山西南歸留連數日一日先公約李飯

明將謀設李已有東促之云昨日分約午  
餐今朝紅日已三竿主翁被酒渾忘却客裏  
誰知忍餓難先公得詩遽遣邀之李已造門  
矣又固始李郎中瀚自留都致仕來訪先公  
亦設燕待之郎中即席有詩云高樓開宴錦雲  
香數遣佳人勸玉觴三紀相逢纔一醉浮生  
能得幾星霜又麻城周憲使鑑自江西致仕  
後來相訪先公又設燕待之周亦有詩云與  
公正統辱同時萬里鴻泥兩地思四十年来  
渾似夢一尊相對幾莖絲

柴潭龍隱

吾汝城之南有積水一潭逢旱則涸相傳即  
孟珙決練江以灌城處有神龍蟄其中每歲  
旱郡守索牛百頭以溷其間使人數之必增

其一三神龍也溷之必雨成化初予為諸生  
從禱日擊其事後屢用其說不驗永樂間楊  
季學先生有詩云積水無源勢易消可曾涓  
滴潤枯焦神龍况是通靈物好做禎祥莫做  
妖

燕良劍

成化甲午春汝陽有李姓者於城西掘地偶

得一銀筒如人大指而虛其中試取之乃一  
紙如細繩其人烘以火徐展之僅尺餘中作  
一圈畫佛像圍以金剛法華諸經字如蚊子  
大極端楷旋轉書之如車輪狀輪之四角各  
衛以一金剛用微藍淡綠染之紙尾云元和  
十年十月十二日弟子燕良劍逆數而上已  
數百年矣李姓者持以示予予識其為殉葬

物也丁元和十年正吳元濟拒命之日唐史  
李愬平淮西在元和十二年劉禹錫詩云忽  
驚元和十二載重見天寶承平時是也予因  
以詩紀之云西法東流百世傳如來無計度  
無緣翻嗟往日燕良劍不見元和十二年

詩人豪放

固陵李郎中弘瀾為人据傲早有詩聲正統

初李文達榜領薦補儒官每恨曰李弘瀾爾  
乃痴坐一氈邪既則仰天大笑繼而泣下酒  
酣得句則亂書牆壁如蛟龍然嘗有一詩云  
自笑儒官果誤身當年翻悔學經綸不如早  
鑄龍泉劍斬却樓蘭報主人後膺薦將補御  
史天曹試葵花向日賦多警句諸公盛稱之  
或譖其在路引旌者天曹不喜遽改國子學

錄又有一詩云一屈賢關又十年從朱朝我  
腹便便長安冠蓋多如雨誰識風流李謫仙  
復轉叙州通判改都臺經歷俱不樂其官每  
經翰苑則駐馬徘徊良久曰李弘瀾爾負此  
生矣晚年為戶部郎中年已六十餘見同官  
皆少年尤不樂一日大書於壁曰白頭老嫗  
插花枝強學妖嬈二八時縱有當年餘韻在

憑誰為爾畫蛾眉又云七十功名逝水波諸  
曹笑我老於婆不如歸去尋詩酒遍醉堯夫  
十二窩遂謝事歸

### 二張太守

石首張漢文守汝日年僅三十餘少年高科  
獲守大郡頗有矜色嘗因歲旦賀正我先君  
留飲府僚咸集石首投壺屢勝一時無與敵

者酒酣戲為一絕云太平時節遇新春此日  
公家樂最真我黍投壺更開鋪滿筵俱是掛  
紅人其風流亦可想也歲迎春將用妓樂先  
君力止之乃曰范仲淹不用慶朔堂妓乎先  
君曰在仲淹則可在太守則不可因笑而止  
後去官時年甫三十九又自為一絕云二十  
登科四十休粗豪翻為少年羞從今勘破黃

梁憂肯待瀟瀟兩鬢秋議者曰使石首遲十  
年作郡則必有令名矣石首既去大名張秉  
彛來代大名不善詩見人有談及者必怒視  
之嘗大言曰我不能詩能取進士也貳守周  
廷威吳人也好吟詩每為所抑一日戲書于  
壁曰郡齋春雨澁蒼苔深鎖吟垓不許開眼  
底翻驚詩禁密金雞銜赦幾時來大名見之

遂為仇敵云

晉臺幼學

天順初先大夫僉憲晉陽予始十齡初延潞城屈主事天衡繼聘陽曲馬進士時中為之師仍扁其館曰憲臺西塾時同游者華亭朱恩汝承乃僉憲瑄之子阜城倪誥汝制乃僉憲通之子暨予三人後稍長師試以文義迭

為魁首師並許之厥後三老各陞轉去成化

甲午汝承中應天京闈登辛丑進士第歷禮

部尚書汝制成化庚子領京闈鄉薦歷廬州

府同知又晉州呂鏗子聲最少乃僉憲正之

子中成化丙午京闈登庚戌進士歷山西左

叅議予丙午始領河南薦赴京時汝承為行

人予訪于寓所始一會越庚戌春試與汝制

會時汝制以濟南學訓試吏部魁選陳州知  
州子聲以是年登第來訪予於寓所亦得一  
會予以春闈再失利丁未入太學庚戌領教  
秩茲叨輔

秦藩及今餘二紀而四友者未嘗得尊酒一叙  
今汝承已歸汝制不聞子聲已物故俯仰今  
昔為之慨然有詩云少叅物故尚書去惆悵

廬州竟不聞舊日同窓今隔世空餘老淚洒  
寒雲

秦臺識別

成化紀元先大夫以陝西憲副分蒞甘肅以  
疾乞休致

詔報允時予齒已十四矣諸公咸送至灞橋座  
間按察使定興李公俊副使大同郭公紀因

戲予曰爾既能詩可以一絕識別予請韻鄭  
公曰橋字耳予即應聲曰臺憲三登際

聖朝東歸晝錦氣凌霄  
痴兒倘遂青雲志建節  
還須過此橋詩成二公大喜先大夫亦為之  
一笑茲予竊祿

秦藩殆將二紀所謂灞橋者往來殆不知其幾  
追思建節之句每為之怵怩

桃源送守

成化戊子汝南郡守石首張公奎朝覲府僚  
悉餞于桃源我先大夫亦在焉時張公年甫  
三十五才氣甚銳酒酣將起馬因笑謂予曰  
可作一絕贈我予即獻詩云平明五馬上京  
師十里桃源餞送時增秩賜金知有待歸來  
爭和謝恩詩誦畢公大悅遂上馬去

揚柳風詩

成化戊子邵工部能王參政汝霖同建

藩府於汝南適李僉憲勝以巡蒞至邵公暇日  
延我先公同三公小酌於紫薇亭予隨侍王  
公吳人嗜吟事因命予作揚柳風詩予請韻  
王公曰林字耳因立獻一絕云吹面微寒破  
曉陰晴堤輕曳萬絲金憑誰借我吹噓力試

送遷鶯到上林誦既三公悅甚同舉壽為先  
公壽

蘇州明敏

劉先生欽謨吳人天性極明敏讀書一目下  
五行且容貌俊偉望之如神人然天順間為  
憲使提河南學嘗合試生徒約千人既第其  
卷越明日諸生之自陳者甚衆先生歷問其

名悉摘其疵語無一人能遁者諸生成驚曰  
劉先生真神明也試日子始非因於卷尾附  
獻一絕云東吳機杼幾千家五色絲頭纈練  
霞獨有先生時樣別等閑織出鳳啣花先生  
目之一笑曰此子可與言詩矣

天台古直

陳先生士賢天台人成化初為御史有佶佶

聲時羅修撰倫劾李文達頗過當

憲廟以倫為狂謫外官先生抗疏救之至有曰

願羅倫為李賢之唐介李賢為羅倫之彥博

時論是之先生嘗提南畿暨中州學遇諸生

嚴而有恩及去任多畫像祀之既而轉廣東

左布政使以公事被收道卒江西城下賴張

翰林元禎棺斂之時有為詩吊者曰氣塞乾

坤老不除清名應有史官書門生海內知多  
少墓下何人為結廬

### 廣安理學

廣安吳先生伯通早悟易學其為詩皆根於  
理有程邵諸大儒意思提河南學日嘗駐節  
郟城王孟寺其主僧曰文敬者好事每達官  
至則拜懇留題內吳方伯行儉一聯云遠公

酒許淵明飲坡老詩因佛印留李方伯正芳  
一聯云錦袍未許高僧着玉帶曾看學士留  
先生獨曰有道欲因文暢告無衣可為太顛  
留便見主張正學之意且其詩高古自成一  
家云

### 竹軒賞音

眉山吳公節號竹軒成化辛卯以河南右布

政使蒞汝南予時在郡校公命作竹軒詩因  
立獻一絕云獨立眉山見此君此君出土即  
超群一朝移植薇垣裏二品偏承雨露恩公  
笑曰詩固佳矣此君終老薇垣乎予又獻一  
絕云百尺琅玕立翠苔移根指日到都臺高  
竿不許群鳥占只待丹山彩鳳來公目畢大  
笑

石洞藻鑑

江浦石先生宗海成化末提學河南試日子  
極蒙獎譽及過省因以一絕見貽曰少日文  
場已著聞今秋逸氣果超群行看飛步烟霄  
上獨對丹墀擬是君今殊愧其言

會稽仕學

會稽胡先生謚號仕學其進進老而不倦又

能忘勢接引士類成化中為河南憲副嘗蒞  
汝郡詢之諸生云郡城之北三里有山曰天  
中上土下石古人測日處所謂豫州為天下  
之中而汝南又為豫州之中宋劉敞有形勢  
雖小當天心之句者以此命縣令訪之莫知  
其處予因獻詩云小山三尺當天心盤旋中  
州自古今想是地靈嫌俗駕茫茫土石竟難  
尋又詩云三尺崢嶸邈莫尋靈根想在那城  
陰群山不用爭高下試看誰當天地心公得  
詩一笑曰秀才可謂占地步賞之

汝南三益

吳黃門道寧毛御史鳳來俱摠友也吳豐偉  
素持重毛踈瘦其文學莫能優劣朋輩嘗戲  
二生曰吳可為黃門毛可為御史毛連捷取

進士知臨晉有赫赫聲時年甫二十三後三年徵為御史未拜卒吳亦連捷取進士授工科給事中後三年亦卒毛在學日有少年態及宰縣雖老於仕宦者弗能及亦其天資所致也毛在臨晉予嘗有詩寄之曰少年作縣莫雷同兩字清廉一字公萬里煙霄休自阻要看一鶚奮秋風吳在科日子亦有一詩寄之

云喜聞通籍侍

皇闈好把心絲補

衮衣幸際太平無一事諸君不是諫書稀又同里吾文瑞幼從予學亦連捷取進士歷官治中嚮用矣早卒予嘗有詩哭之云憶初同榻日相從十載雞垓一夢中同學少年俱不見惟餘老淚洒西風

三寧居士

祝廷瑞其先鄱陽人博古能詩多藝能景泰  
初為御史調長子令遷濟寧知州改靖寧靖  
寧屬平涼府有一同知下州以廷瑞簡於禮  
怒之廷瑞因述一絕云南巡雲廣北遼東多  
少英雄過眼中堪笑平涼張貳守也來簾下  
舞西風張慚恨而去在靖寧日偶郡圃鋤地

得一銅印文曰汝南清風堂記攷地志汝南  
即今汝寧也因為長歌以記之末句云濟寧  
靖寧又汝寧拜賜三寧居士號未幾果陞汝  
寧府知府遂自號三寧居士云在汝寧日與  
梁左相宗文相倡和宗文辭翰實與之伯仲  
廷瑞和其旗字韻有曰筆為鋒刃硯為池到  
處逢人與角持三十年来無與敵為君今日

豎降旗詩畢笑謂宗文曰聃和旗韻耳非實降也

郡齋延館

錢唐錢公大用成化中知汝寧府時予為士公自延為館客俾教諸子公既滿陞陝西左叅政會時荒旱極力賑濟西人德之予嘗有詩奉寄云聞說錢叅政旬宣華岳前徐將一隻手擎住半邊天康濟宜今日經綸自昔年撫巡真有待西

顧正求賢

畢升活字

祝太守廷瑞嘗為予言天順間錢溥學士使安南與其國相等倡和明日即印成詩集此活字板也予因問之乃言活書板宋慶曆中

畢升作世未有見之者未幾汝南一武弁家  
治地忽得黑子數百枚堅如牛角每子有一  
字如歐陽詢體予得十數以獻太守識之曰  
此即宋活字其精巧非畢升不能作

秋闈紀夢

予自成化辛卯履場屋屢戰屢北歷丙午蓋  
十六年矣自分碌碌無復科甲之望其年七

月初將赴汴闈忽夢一分司至諸生入謁人  
給鄉試錄一本印墨尚濕予揭而試之見已  
名乃贅在錄尾頗不樂明日因話于知己者  
咸笑曰此所謂顛之倒之反在諸公之上者  
吾友必發解矣及至臨穎宿驛舍夢我先憲  
使公衣冠坐堂上晟拜跪階下先公命之進  
晟膝行前遂用案上筆於晟面大書三字既

驚寤晟知必過省但未喻三字及錄尾意既  
揭曉得試錄止刊晟第五對乃錄尾也繼領  
公據始見卷面上大批一三字蓋晟以詩經  
第三卷列第九將登榜乃謝御史綱所署也夫  
一鄉薦且然矧大科高位

膺薦纂修

成化丁未修

憲廟實錄禮曹委進士邢君纓來河南省督其  
事予時為貢士在汝辱布政使徐公恪參政  
舒公清按察使傅公希說等薦予入局自六  
月至十月錄成燕勞而還一時同會者邵  
許州寶施同知文顯沈同知繼先藍教授昌  
陳學正瀚陳學正完劉學正耀予以舉子而  
廁于諸仕者之列縉紳咸以為榮汴城致政

呂僉憲益先公之舊僚也贈予一絕云硯池  
如沼筆如椽細錄

先朝二十年從此莫教淹驥足好騰頭角上青  
天

太學上詩

成化丙午予忝鄉薦明年春闈不利入太學  
越兩月始得歸有一律上大司成云北極天

高朔雪寒敢辭跋涉叩賢關羞隨百二英雄  
後浪逐三千弟子班六館師儒今最盛一時  
宗主古來艱南歸極口逢人說坐滿春風兩  
月還

成化 玉堂選士

私洽丁未春予初下南宮第留滯長安時  
召選新進士樂平程正之等三十人入翰林為

庶吉士而吾上蔡李希賢與焉諸吉士每聯  
鑣竝出衣冠文物聳動一時士類榮之予或  
騎驢往來入太學過玉堂之署咫尺凝望無  
異弱水之隔然者因作三律托希賢以東諸  
吉士予詩有云乘驢來徃徒翹首自愧郎當  
似郭郎又有句云却笑狂夫徒羨慕南歸渴  
睡又三年程和云他年蹇蹇新人物不道尋  
常騎馬郎又云相逢定有相知客狼藉鶯花  
又一年時予將歸汝南故程詩及之越庚戌  
復就南宮試正之已脩撰翰林希賢為檢討  
而予乃再下第補冷官得陋邑所謂井天者  
每讀正之之詩不覺愧汗之霑體也

春闈紀夢

成化庚戌會試既三戰予夢與諸藍袍同入

朝俱由左門入衆皆立東墀人被一錦如世俗  
所謂掛紅者予獨立西墀散錦者不及劉解  
元大用招之曰前輩可來此領錦段予以  
天顏咫尺不敢踰階辭既而俱叩首退大用等  
出左門予獨由右門出既寤予知大用必登  
第後果然但予與諸披錦者同出入意者雖  
未得甲科而今亦叨金紫固非佛地位中人  
其亦謬羅漢果者歟可發一笑亦嘗有詩記  
之云吉夢人人得錦標西墀何事獨無聯固  
知造物真相戲也把黃金繫我腰

尚書異夢

戶部尚書薛公遠予先公年友也成化末致  
仕寓京師金水橋里第予因往拜於其家公  
留飯甚款曲因自言乃祖亦尚書以事子孫

發戍瓊州遠年十八九時役一千戶下自知  
讀書為文正統初當大比懇于千戶許就試  
忽夢造一大公府一金紫人據廳事散束帶  
自角至金領者甚衆及遠散已盡乃長跪懇  
乞曰遠微賤為人後不敢望黃白者苟得一  
角帶亦足矣金紫者顧笑曰散既盡柰何命  
侍者取一白布圍之既寤大不樂私自念曰

吾豈功名無分乎勉就試遂領廣東鄉解連  
捷登進士第歷今官以

孝廟登極推恩有玉帶之賜前所夢白布圍者  
乃此也亦嘗有詩識之云記得孤身試廣闈  
戎衣未許換麻衣當時祇夢纏腰布今日方  
知玉帶圍噫公壽踰八旬官登一品信非偶  
然也因退而記之

怡素古淡

林先生輔崇德人正統初魁江浙善為選詩  
晚年益古淡為

崇王紀善日年已七十矣嘗雪後和林孟和  
主事云庭槐集栖烏暝合日將夕鏗鏗聞有  
聲踏碎瓊瑤陌知是童子來傳詩為君後百  
韻不衰有一氣呵成氣象予甚愛之先生以

予久困場屋嘗贈詩有眼底功名催促緊口  
頭閭闔叫開難之戲梁左史宗文和韻亦有  
龍珠奪出龍淵易虎子擒來虎穴難之句余  
錦衣德聲獨云天馬行空真是易鮎魚上竹  
自來難是又謔之虐者也可一笑

華陰紀夢

弘治庚戌予以春闈不利領教得陋邑秋暮

道華陰因為一絕寄意云失脚西來醉又顛  
騎驢直過縣門前華陰大尹如相問也是風  
流一謫仙夜宿華山驛忽夢一人葛巾道服  
風度閑雅笑謂予曰子詩甚佳吾為子和乃  
誦其詩曰茫茫塵海萬人顛此日相逢華岳  
前我有一言君記取英雄回首即神仙既寤  
甚異之

